



KUVENDI I KOSOVËS
СКУПШТИНА КОСОВА
ASSEMBLY OF KOSOVO

Seanca Plenare
Seanca nr.2003/24
Prishtinë,më 18 shtator 2003,në orën 10:00
Ndërtesa e Kuvendit të Prishtinës.

PROCESVERBAL

Seancën e kryesoi Nexhat **DACI**, kryetar i Kuvendit, kurse bashkëkryesues ishte Hydajet Hyseni,anëtar i Kryesisë.

Kryetari konstatoi se në seancë ishin të pranishëm 101 deputetë dhe shpalli të hapur punën e saj.

Kuvendi në seancën e mëparshme e kishte miratuar këtë

REND TË DITËS:

1. Miratimi i procesverbalit të seancës së mëparshme.
2. Shqyrtimi i situatës politike në Kosovë;
3. Shqyrtimi i parë i P/ligjit për produktet dhe pajisjet medicinale-nr.2003/17;
4. Shqyrtimi i parë i P/ligjit për për inspektoratin sanitar-nr.2003/25;dhe
5. Propozimi i rendit të ditës për seancën e ardhshme plenare që do të mbahet më 25 shtaor 2003.

Kryetari kërkoi nga deputetët e Kuvendit të procedohet sipas rendit të ditës të miratuar në seancën e mëparshme.

1. Miratimi i procesverbalit të seancës së mëparshme.

Nuk pati vërejtje lidhur me procesverbalin e seancës së mëparshme,prandaj u miratua.

2. Shqyrtimi i situatës politike në Kosovë.

Kryetari e hapi debatin lidhur me këtë pikë të rendit të ditës.

Sabri Hamiti- Situatën politike në Kosovë tashpërtash e përcaktojnë një qeverisje dykrenëshe – në mes të UNMIK-ut dhe institucioneve të Kosovës, një ekonomi në mbrapambetje dhe një gjendje sociale që mund t' shpërthejë. Kompetencat dhe përgjegjësitë në këtë qeverisje nuk kanë një drejtpeshim. UNMIK-u ende pretendon të ruajë apo rrisë kompetencat. Në anën tjetër, institucionet e Kosovës, mbajnë përgjegjësinë para qytetarëve, duke pretenduar t'i marrin edhe kompetencat. UNMIK-u rezervon për vete kontrollin e fushave më vitale të qeverisjes dhe të zhvillimit të shoqërisë, përfaqësimin politik, financat, drejtësinë dhe sigurinë. Në të gjitha këto fusha, përfaqësuesit vendas nuk e kanë fuqinë e vërtetë të veprimit përpos retorikës për zhvillimin e shoqërisë përpara. Në anën tjetër, në po këto fusha, shihen problemet më të ndryshme që kanë të bëjnë me statusin, me qeverisjen dhe me jetën e qytetarëve të Kosovës. Kontrollimi joracional i financave, përballë nevojave imamente të fushave të ndryshme të jetës në Kosovë, po krijon suficitin e buxhetit. Në anën tjetër, shtresa të tëra të njerëzve janë në gjendje sociale të padurueshme, diku-diku para shpërthimit.

Me një fjalë: statusi i tashëm i papërcaktuar politik i Kosovës, është bërë pengesë për zhvillimin dhe për demokracinë e saj. Standardet e shpallura nga UNMIK-u, si faza që duhen të kalohen para statusit, janë bërë gati formulë retorike, e pazbërthyeshme në praktikë. Çështja jështë: kush i shpallë standardet, kush i realizon dhe kush e vlerëson këtë realizim.

Tensionet në Kosovë, në mënyrë permanente i shton ndërhyerja e Serbisë, e cila bëhet në mënyrë të ndryshme, por më së shpeshti duke instrumentalizuar politikisht qytetarët serbë në Kosovë, madje edhe në institucionet e vendit për politikën e tyre dhe në mënyrë të organizuar shtetërore duke aprovuar dokumente kushtetuese për ta bërë aneksimin e Kosovës.

Bashkësia ndërkombëtare, deri më tash, ka reaguar tepër dobët, për të mos thënë – pahetueshëm kundrejt këtij agresiviteti kushtetues të unionit Serbi – Mali i zi dhe të Serbisë. Është i domosdoshëm një artikulum i qartë i Këshillit të Sigurimit, i SHBA-ve dhe i BE-s për zhvlerësimin juridik të këtyre deklaratave para se të kërkohet një stabilitet politik në Kosovë dhe në rajon.

Në Kosovë është organizuar rrezistenca – nga ajo paqësore e demokratike, duke kaluar në rrezistencë të armatosur deri në luftën për çlirim. Të gjitha këto zhvillime të domosdoshme dhe të detyrueshme, që lidhen me ekzistencën e një populli dhe të një vendi, të gjitha këto mësimet të historisë më të re, kanë dhënë përfundimet se Kosova ka të kushtëzuarën – ekzistencën e vet nga pavarësia dhe demokracia e saj.

Çdo bisedim për një të ardhme, pra – duhet t'i ketë në evidencë e në kujdes këto të dhëna të së tashmes dhe të së kaluarës së afërt të Kosovës. Po nuk u patën parasysh dhe në kujdes këto evidenca, të gjitha bisedimet bëhen të vështira, të pamundshme dhe në instancën e fundit – me përfundime vështirë të realizueshme.

Lidhja Demokratike e Kosovës, duke i qëndruar besnike zbatimit të Programit të saj nacional, politik e qytetar, e pranon dialogun si metodë të zgjidhjes së problemeve shoqërore dhe politike, e mirëpret bashkëpunimin ndërkombëtar për zgjidhjen e të gjitha çështjeve që dalin në udhën e krijimit të Kosovës së pavarur dhe demokratike.

Arsim Bajrami- Sot po diskutojmë për një çështje të rëndësishme dhe çështje mjaft aktuale rreth zhvillimeve aktuale politike. Duhet të pretendojmë që si Kuvend, si organ që ka përgjegjësi edhe para popullit, por edhe para dokumenteve kushtetuese, të marrim qëndrime për sfidat që po kalon Kosova dhe të arrijmë një konsensus institucional dhe në një mënyrë të kemi pozicione shumë të qarta.

Në këtë kontekst, me qëllim të arritjes së një konsensusi institucional çfarë i duhet Kosovës për këto probleme me të cilat po ballafaqohet, ka qenë e domosdoshme që në këtë seancë të vijë kryeministri i Kosovës dhe kryetari i Kosovës, të cilët janë ftuar dhe unë, edhe një herë përsëris kërkesën e Grupit Parlamentar të PDK-së që për seancën e ardhshme ata të ftohen.

Mendoj se situata aktuale politike në Kosovë karakterizohet me disa veçori, me disa probleme. Unë do t'i veçoja tri më të rëndësishmet.

E para, ka kohë që Kosova, gjithmonë po atakohet nga jashtë, sidomos nga Qeveria e Beogradit, e cila ka një interes të dyfishtë në Kosovë. Interesi i saj i parë, është për ta destabilizuar gjithmonë Kosovën, për ta ndalur rrugën e progresit të saj demokratik dhe, e dyta – për ta kompromituar edhe Misionin e Kombeve të Bashkuara në Kosovë.

Mendoj se ky Kuvend, në proces, ka tentuar që në vetëmbrojtje t'i paralizojë këto provokime. Provokime që, po e përsëris, kanë qenë të dyfishta ndaj Kosovës, por edhe ndaj Misionit ndërkombëtar të Kombeve të Bashkuara. Dhe është e nevojshme që përsëri, ky Kuvend, të marrë një qëndrim që çdo përpjekje e tillë të jetë e pavlefshme në raport me Kosovën dhe të jetë inekzistent. Kosova ka rrugën e vet, rrugën e ecjes përpara bashkë me bashkësinë ndërkombëtare dhe rrugës drejt implementimit të vullnetit politik të popullit shumicë.

Çështja e dytë, e cila është një gjenerator që gjithmonë po reprodukon kriza dhe po ngadalëson procesin e avancimit demokratik të Kosovës, padyshim është procesi i ngadalshëm i bartjes së përgjegjësi.

Kaluan tani katër vite që Kosova është nën administrimin ndërkombëtar dhe akoma këtu nuk kemi vetëqeverisje substanciale, siç thotë Rezoluta 1244. Do të thoja, nuk kemi fare vetëqeverisje. Kemi një proces shumë të ngadalshëm të bartjes së kompetencave që në një mënyrë po e ngadalëson procesin e avancimit demokratik.

Mendoj se ka ardhur koha, meqenëse dy nga qëllimet strategjike të Rezolutës 1244 janë realizuar. Pra, qëllimi i parë – ndalja e luftës dhe qëllimi i dytë – ndërtimi i strukturës demokratike. Ato janë realizuar për shkak se sot kemi struktura demokratike në nivel të Kosovës dhe në nivel të komunave. Ka ardhur koha që Kosova të përgatitet dhe të jetë e gatshme për fazën e tretë, pra fazën e definimit të statusit final dhe në emër të Grupit Parlamentar të PDK kërkoj nga bashkësia ndërkombëtare, sidomos nga UNMIK-u që të fillojë menjëherë pashtyeshëm t'i bartë të gjitha kompetencat, në mënyrë që të përgatitet zgjidhja e statusit final të Kosovës.

Mendoj se në këtë drejtim, është e domosdoshme që, pashtyeshëm, të bëhen ndryshime legale dhe konstitucionale në atë mënyrë që duhet të ndryshohet Korniza kushtetuese dhe të kompletohet struktura qeveritare e Kosovës. Pra t'i mundësohet këtij Parlamenti demokratik që të nxjerrë ligje sistemore, ligje organike, të cilat i duhen Kosovës.

Duhet t'i mundësohet ndërtimi i një sistemi të pavarur gjyqësor dhe një sistemi të sigurisë dhe mbrojtjes në Kosovë.

Dhe, **çështja e tretë**, që është mjaft aktuale dhe për të cilën sot në emër të Grupit Parlamentar të PDK-së kërkojmë qëndrim të qartë të Kuvendit, është çështja e të ashtuquajturave kontaktet e para ndërmjet Kosovës dhe Serbisë. Pra, një proces që shumë po përfolet, një proces që kërkon qëndrim institucional, jo qëndrim politik, jo dhënie të deklaratave pompoze, por një seriozitet të këtij Kuvendit, në mënyrë që vërtetë këtu të ndërtojmë një bazë të mirë dhe të sqarohen shumë gjëra.

Unë mendoj se këto kontakte po imponohen në një kontekst shumë të papërshtatshëm për Kosovën. Të ashtuquajturat bisedat teknike krijojnë një konfuzion për shkak se akoma nuk kemi një agjendë të qartë se cilat do të jenë temat e këtyre kontakteve. Në fakt, shumica e atyre çështjeve që janë dëgjuar në media, nuk kanë të bëjnë me çështje teknike, por do të them janë çështje sistemore dhe substanciale, të cilat kanë dhe reflektojnë në statusin final të Kosovës.

Për këtë arsye, unë angazhohem që Kuvendi i Kosovës sot të debatojë gjerësisht, ka apo s'ka nevojë Kosova të hyjë në këto bisedime Dhe në qoftë se këtu ekziston një shumicë apo një vullnet i shumicës që megjithatë janë pjekur kushtet për këto kontakte, atëherë ne duhet, si organ ligjdhënës, por edhe si organ më i lartë në Kosovë, të obligojmë Qeverinë edhe kryetarin që ata të vijnë, të prezantojnë opinionet dhe platformën e tyre se si i shohin këto bisedime.

Çështja e fundit, është çështja e përgatitjes së këtij Kuvendi për të qenë faktorë i finalizimit të statusit final të Kosovës.

Unë mendoj se ky Kuvend duhet të përgatitet tani që ta ushtrojë përgjegjësinë që ka, përgjegjësinë e dyfishtë: përgjegjësinë para elektoratit, i cili na ka dhënë besimin dhe legjitimitetin demokratik, por edhe përgjegjësinë ligjore që të përgatitet për të qenë subjekt i finalizimit të statusit final të Kosovës. Dhe, në këtë drejtim, në emër të Grupit Parlamentar të Partisë Demokratike, kërkoj që të fillohet puna në përgatitjen e bazës së re kushtetuese.

Oliver Ivanoviq- Çështjet e situatës politike dhe të sigurisë, kemi mundur ta shqyrtojmë edhe më herët dhe ajo ka mundur të zhvillohet në një kahje tjetër. Në kontekst të gjith kësaj që ka ndodhur brenda dy-tre muajve ka qenë një periudhë e rëndë. Më duhet të them në emër të bashkësisë që e përfaqësojë, janë vrarë tetë serb, e cila ka ndikuar në krijimin e një atmosferë jo të mirë për bisedimet ardhshme.

Bisedimet me Beogradin nuk mund të mbahen pa ndërmjetësues. Por, neve na duhet ndonjë ndërmjetësues që me autoritetin e tij dhe rolin që ka në marrëdhëniet ndërkombëtare të garantojë zbatimin e asaj marrëveshje që do të arrihet.

Nuk duhet të harrojmë faktin, që më herët edhe z. Kris Paten në këtë Kuvend e theksoi, zhvillimin e shoqërisë multietnike që është alfa dhe omega e secilës shoqëri demokratike. Ajo nuk është e pamundur në një perspektivë të afërtë që do të krijonte kushte për një zhvillim ekonomik që do t'i hiqte kufijt dhe jo krijimin e kufijëve të rinjë. Zhvillimi ekonomik krijon kushte për të gjithë që janë të interesuar të investojnë në Kosovë në një ambient të sigurtë dhe që paratë e investuara mund t'i tërheq për një apo pesë vjet.

Temat për bisedimet me Beogardin janë të tilla që nuk lënë vend për asnjë politizim është psh. energjetika. Ne e kemi të qartë se nuk mund ta kalojmë këtë dimër pa importuar rrymë. Prandaj, më logjike është që ajo të importohet prej elektroekonomisë së Serbisë se sa prej Italisë, Ruamisë apo ndonjë vendi tjetër. Çështja e telekomunikacionit-që thirrjet

prej Mitrovice për në Prishtinë të bëhen përmes Kraleves, Kragujevcit, Nishit, a nuk është më logjike që ato të bëhet drejtpërdrejt. Këto janë probleme që mund të zgjidhen. Në bazë të këtyre temave, mund të shtrohet çështja e ndieshme-ajo e kthimit. Në një situatë të euforisë çfarë b retron sot, në mënyrë të drejtpërdrejt apo të erthortë pengohet kthimi i serbëve.

Pajtohem me parafolsit se z. Holker nuk mundet të jetë mediator i bisedimeve ndërmjet Prishtinës dhe Beogradit. Ai është përfaqësues i bashkësisë ndërkombtare në Kosovë dhe ende i mbanë të drejtat e rezervuar për disa çështje. Ai duhet të jetë në përbërje të delegacionit të Kosovës. Mediator për këto bisedime nuk mund të jetë ndonjë person, por duhet të jetë Grupi i Kontaktit.

Mendojë se duhet me një optimizëm të shkojmë në këto bisedime.

Ramush Haradinaj- Kur flasim për situatën politike, mendoj se është mirë të bëhet një vështrim i situatës së përgjithshme në Kosovë.

Para se të filloj me atë që mendoj se është me rëndësi që edhe Parlamenti i Kosovës të nxjerrë edhe vlerësimet e veta. Dëshiroj të theksoj se situata e sigurisë në Kosovë, është stabile, ku përjashtim bën vetëm veriu i Kosovës.

Ajo që sot del para nesh, me të gjitha format e veta, është një gjendje ekonomike dhe e vështirë, një infrastrukturë e vjetëruar në Kosovë, një papunësi e madhe dhe si rezultat i kësaj edhe një gjendje sociale që është e vështirë, për shum kategori të qytetarëve tanë.

Mendojmë se e tërë kjo do të ishte më lehtë e përballueshme në rast se Kosova do të ndodhej në situatë të veprimit të plotë me përgjegjësitë, gjegjësisht me instrumentet e nevojshme për veprim. Si rezultat i kësaj, populli i Kosovës, është mendim imi dhe i Aleancës, po zbehë besimin e vet në qendrat e vendosjes dhe kësaj edhe në njerëzit e zgjedhur të Kosovës. Andaj, mendoj se veprimi më efikas dhe i vetmi që do t'i ndryshonte rrethanat për të mirë në Kosovë është ndërtimi i vullnetit politik të popullit të Kosovës. Rolin kyç për këtë e kanë institucionet e Kosovës, veçanërisht Parlamenti dhe Qeveria.

Si partnerë qeverisës, jemi të gatshëm dhe ftojmë partnerët tanë, në këtë rast partitë politike vendore, që të bashkëveprojmë në shpalljen e Kosovës shtet sovran dhe të pavarur dhe gjithësesi që ta aprovojmë planin për veprim që do të nënkuptonte planin për implementim të vullnetit politik të popullit të Kosovës, vullnet ky i shprehur, i definuar edhe më përpara.

Aleanca për Ardhmërinë e Kosovës, në vazhdimësi ka shprehur gatishmërinë për bashkëpunimin e ndërsjellë me faktorët vendor dhe me përfaqësuesit e pakicave, të cilat i konsiderojmë si partnerë shumë të dobishëm në procesin në të cilin ndodhet Kosova.

Bashkëpunimi i mirë me bashkësinë ndërkombëtare ka shënuar edhe të arritura dhe rezultate. Kur ky bashkëpunim ka qenë i mirë, kemi të arritura të përbashkëta. Mirëpo, mendoj se ngecjet në bashkëpunimin e ndërsjellë ndërmjet institucioneve të Kosovës dhe të UNMIK-ut kanë shkaktuar edhe pasojat e para për procesin. Nuk është mirë që t'i fshehim dhe që të mos i shprehim ato.

Në Kosovë janë vërejtur ngecje, sidomos në atë që është kuptuar si proces i ndërtimit të mëtutjeshëm të institucioneve të Kosovës. Ndërsa ajo që personalisht mua, por edhe Aleancën na habitë shumë, është një angazhim i UNMIK-ut i ç'orientuar në këto momente. Pra, është një dezorientim në angazhime. Është e çuditshme se si UNMIK-u

dhe zoti Hollkeri gjithë angazhimin e vet, që nga ardhja në Kosovë, e ka vetëm për një çështje në agjendën e vet – çka do të ndodhë ndërmjet Prishtinës dhe Beogradit.

Ne e mendojmë këtë çështje të rëndësishme, pra i japim rëndësinë e vet por po ashtu nuk mund të kuptojmë se si UNMIK-u, gjatë gjithë kohës, angazhimin e vet e orienton në këtë çështje.

Mendojmë se, që të ketë sukses angazhimi dhe ndihmesa që jep UNMIK-u për një çështje të tillë të bashkëpunimit ose të shkëmbimeve Prishtinë - Beograd, në radhë të parë UNMIK-u duhet të shënojë të arritura ose suksese në bashkëpunimin UNMIK – Prishtinë.,pra të vazhdohet procesi i filluar më përpara.

Ne, si Aleancë për Ardhmërinë e Kosovës, nuk mund dhe nuk do t'i japim mbështetje një angazhimi të këtillë, i cili lë anash angazhimet e përbashkëta për ndërtimin e mëtutjeshëm të institucioneve të Kosovës dhe avancimin e bazës kushtetuese.

Mendoj se ne duhet të përballemi me veten, veçanërisht partitë politike që janë nënshkruese të koalicionit qeverisës dhe duhet t'i dalim zot vetes në këto rrethana, në të cilat ndodhemi.

Por, si mund të veprojmë ne që të ndodhin këto biseda e të jenë të sukseshme? Ne duhet ta ndërtojmë veten. I kemi dy rrugë: një është të veprojmë vetë – ta shpallim Kosovën shtet sovran dhe të pavarur në këtë Parlament; nxjerrim një platformë për hartimin e kushtetutës, mendoj planin për diskutim publik të kësaj projektkushtetute; ta paralajmërojmë referendumin. Pra, ta plotësojmë Qeverinë me ministri të nevojshme, ta zëmë të rendit, të drejtësisë, të ministrisë së jashtme dhe kësaj ne mund të jemi të përgatitur dhe mund të kthehemi në partnerë edhe të ndërtuar për biseda. Në rast se ne, si Kosovë, shkojmë në këto biseda çfarëdoqofshin këto, edhe teknike e që mund të shkojmë për shkak të rrethanave politike çfarë janë duke u zhvilluar dhe të kërkesave që po vijnë tek ne, mendoj se ne jemi duke i bërë dëm vetes.

Sadik I drizi-Grupa Parlamentare e “komuniteteve tjera” të cilën e përbëjnë 11 deputet është heterogjene për nga pikëpamja politike dhe etnike.Ne e ndajmë fatin e të gjithë qytetarve të Kosovës.Pjesa dërmuese e këtyre komuniteteve është integruar në shoqërinë kosovare.Gjatë luftës dhe pas saj,disa pjestarë të tanë e kanë lëshuar Kosovën dhe ende gjenden jashtë saj.

Dialogu ndërmjet Prishtinës dhe Beogradit do të zhvillohet.Sa ne jemi të përgatitur,do ta tregojë koha.

Përfaqësuesit e këtyre komuniteteve konsiderojnë se duhet të inkuadrohen në këto bisedime,ngase ka çështje specifike për ne dhe dëshirojmë të japim kontributintonë.Dëshirojmë të jemi të përfaqësuar në delegacionin e Kosovës për bisedimet Prishtinë-Beograd.

Diskutimet e plota të kryetarëve të grupeve parlamentare i janë bashkangjitur stenogramit.

Opinionet,vëretjet dhe sugjerimet lidhur me këtë pikë të reendit të ditës i dhanë edhe deputetët:Hasan Meta,Fatmir Rexhepi,Smajl Latifaj,Milovan Jovanoviq,Shefki Sejdiu,Muhamed Kelmendi,Sala Ahmetaj,Edita Tahiri,Mahit Jakgjilar dhe Sylejman Çerkezi që i janë bashkangjitur stenogramit të seancës.

Kuvendi, me shumicë votash vendosi që kryetarët e grupeve parlamentare, në bazë të diskutimeve të zhvilluara dhe të deponuara me shkrim, t'i hartojnë rekomandimet lidhur me këtë pikë të rendit të ditës dhe t'ia paraqesin Kuvendit për miratim në seancën e ardhshme.

3. Shqyrtimi i parë i P/ligjit për produktet dhe pajisjet medicinale-nr.2003/17.

Kryesuesi e ftoi ministren e Shëndetësisë ta arsyetojnte këtë p/ligj para deputetëve të Kuvendit.

Ministrja Resmije Momxhiu-kam kënaqësi sot para jush të bëj prezentimin e ligjit për produktet dhe pajisjet medicinale.

Kosova është rajon i vetmi në kontinentin e Evropës që nuk ka ligj që rregullon këtë sferë të rëndësishme dhe esenciale për shëndetin e përgjithshëm publik. Fakti se na mungon një ligj i këtillë është mëse alarmant, meqenëse derisa të rregullohet kjo sferë e legjislacionit shëndeti publik mbetet i rrezikuar nga produktet dhe pajisjet medicinale, të cilat vazhdojnë të vërshojnë tregun e Kosovës me një kontroll superficiale në mungesë të ligjit me anë të të cilit do të vihej baza ligjore që kontrollon edhe sigurimin e pajisjeve dhe produkteve medicinale që importohet dhe prodhohet në Kosovë të jenë të kualitetit të duhur.

Ligji përmban 5 kapituj.

Kapitulli i parë, përmban dispozitat e përgjithshme ku përfshihen qëllimi dhe aplikimi i ligjit; definicionit dhe rregullat e interpretimit të ligjit dhe autoritetet kompetente për mbikëqyrje e implementim të ligjit.

Kapitulli i dytë. Ky kapitull është palca e këtij ligji. Titullohet – produktet medicinale. Kapitulli përmban dispozitat që rregullojnë pa përjashtim të gjitha sferat dhe aspektet e produkteve medicinale, apo përndryshe barnave, duke filluar që nga prodhimi, importi, eksporti, tregtimi i tyre me shumicë, dispensimi dhe qarkullimi farmaceutik me pakicë, prodhimi i tyre në farmaci dhe laboratore galenike, autorizimi i marketingut për produktet medicinale, klasifikimi i statusit të dispozitave të tyre, hulumtimet kimike.

Kapitulli i tretë përmban gjithashtu dispozitat që rregullojnë sferën e pajisjeve medicinale. Këtu janë përfshirë dispozitat që rregullojnë klasifikimin e pajisjeve medicinale, plasimin e tyre në treg, vënia në shërbim, etiketimin, prodhimin, import-eksportin e tyre, përdorimin e tyre profesional, mbikëqyrjen e rregullimit të tyre, përfshirë këtu edhe monitorimin e efekteve që mund të dalin nga përdorimi i tyre, si dhe çështjet tjera të natyrës profesionale të kësaj fushe.

Kapitulli i katërtë përfshinë strukturën, funksionet dhe përgjegjësitë e autoriteteve kompetente për zbatimin e këtij ligji. Përgjegjësinë për zbatimin e ligjit e mban Agjencioni i Kosovës për produktet dhe pajisjet medicinale, nën jurisdiksionin e Ministrisë dhe që është shtylla e ministrisë të destinaura specifikisht për këtë sektor.

Dhe kapitulli i pestë përmban dispozitat, standardet që përfshijnë çdo legjislacion modern dhe që përmban nënshkrimet globale, dispozitat kalimtare dhe ato përfundimtare.

Më lejoni, i nderuar kryesues, të nderuar deputetë, që në përmbyllje të këtij prezentimi, të theksoj edhe një herë nevojën urgjente me të cilën përballohet Kosova sot për rregullimin e kësaj sferë të shëndetësisë së popullsisë së Kosovës dhe me këtë rast të apeloj edhe një

herë për mirëkuptimin tuaj në procedimin sa më të shpejtë drejt miratimit dhe fuqizimit të këtij ligji.

Opinionet, vërejtjet dhe sugjerimet lidhur me këtë p/ligj i dhanë deputetët: Nafye Gas, Naim Jerliu, Teuta Hadri, Cveta Vujiçiq, Zylfije Hundozi, Ramadan Kelmendi dhe Hasan Meta që i janë bashkangjitur stenogramit.

Kryesuesi e vuri në votim këtë p/ligj dhe rezultati ishte si vijon:

Për-----shumica;
Kundër-----8;
Abstenime----- 0.

Kryesuesi konstatoi: Kuvendi i Kosovës e miratoi në parim P/ligjin për pajisjet dhe produktet medicinale-nr.2003/17 dhe i ngarkoi komisionet kryesore dhe Komisionin e Shëndetësisë që ta shqyrtojnë këtë p/ligj brenda tri javë ditësh dhe t'ia paraqesin Kuvendit raportet dhe rekomandime për miratim.

4. Shqyrtimi i parë i P/ligjit për Inspektoratin Sanitar-nr.2003/24.

Kryesuesi e ftoi ministren e Shëndetësisë që ta arsyetojë këtë p/ligj para deputetëve të Kuvendit.

Ministrja Resmije Momxhiu-Kam nderin që para jush t'ju prezentoj edhe Ligjin për inspektoratin sanitar të Kosovës. Inspektorati sanitar i Kosovës vepron në kuadër të Ministrisë së Shëndetësisë dhe është organ ekzekutiv i specializuar për kontrollin e kualitetit të ushqimit, pastaj zbatimin e masave për pengim dhe eliminimin e sëmundjeve ngjithëse si dhe kontrollimin e kushteve higjieno-sanitare të objekteve, industrialo-ushqimore, tregtaro-ushqimore, shëndetësore, hoteliere, kulturore, edukativo-arsimore, sportive, të objekteve të mbajtjes së higjienës personale, e tjera, me qëllim të mbrojtjes së shëndetit të popullsisë. Ushqimi jokualitativ ose i pakontrolluar është një prej shkaqeve kryesore të sëmundjeve në vendet e zhvilluara dhe ato në zhvillim, por më tepër zhvillimi ekonomik dhe globalizmi i tregut botëror si dhe ndryshimet në mënyrën e të ushqyerit me konsum më të madh të produkteve të industrializuara, pastaj rritja e konsumit të ushqimit jashtë shtëpisë, si dhe futja e masave bazë të higjienës kanë ndryshuar profilin epidemiologjik të sëmundjeve me prejardhje ushqimore, duke ekspozuar konsumatorë me lloj të ndryshme kontaminuese.

Duke patur parasysh periudhën katërvjeçare të pasluftës, mbrojtja e shëndetit të popullatës nuk ka qenë në nivel të duhur për shkak të mungesës së infrastrukturës ligjore të organizimit të inspektoratit sanitar, prandaj ka qenë më se e domosdoshme të propozohet ky ligj.

Me këtë Projektligj do të kemi kontroll shumë më efikas të ushqimit, higjienës që do të ndikojë drejtpërdrejt në shëndetin e gjithë popullatës.

Në fund ministrja Momxhiu i ftoi deputetët e Kuvendit që ta miratonin këtë p/ligj.

Kryesuesi e hapi debatin për shqyrtimin në parim të këtij p/ligji.

Opinionet, vërejtjet dhe sugjerimet lidhur me këtë p/ligj i dhanë deputetët: Nafye Gas, Tom Hajdaraj, Naim Jerliu, Sejdullah Hoxha, Svetomir Samargjiq, Blerim Baruti, Remzije Nimani dhe Fadil Kryeziu që i janë bashkangjitur stenogramit.

Kryesuesi e vuri në votim P/ligjin për inspektoratin sanitar dhe rezultati ishte si vijon:

Për-----shumica;
Kundër-----13;
Abstenime-----0.

Kryesuesi konstatoi: Kuvendi i Kosovës e miratoi në parim P/ligjin për Inspektoratin Sanitar dhe ngarkoi komisionet kryesore dhe Komisioni për Shëndetësi që ta shqyrtojnë këtë p/ligj brenda tri javësh dhe t'ia paraqesin Kuvendit raporetet me rekomandime për miratim.

5. Propozimi i rendit të ditës për seancën e ardhshme plenare të 25 shtatorit 2003.

Kryesia i kishte propozuar Kuvendit rendin e ditës për seancën plenare të 25 shtatorit, si vijon:

1. Shqyrtimi i dytë i P/ligjit për siguri në punë, mbrojtje të shëndetit dhe të mjedisit të punës; dhe
2. Shqyrtimi i parë i P/ligjit për ndryshimin dhe plotësimin e Ligjit për menaxhimin e financave publike.

Kuvendi, me shumicë votash e miratoi rendin e propozuar të ditës për seancën plenare të 25 shtatorit 2003.

Seanca përfundoi në orën 14:10 minuta.

Sekretaria e Kuvendit

Kryetari i Kuvendit të Kosovës,

akademik **Nexhat DACI**